



Landjugiprogramm

April - Juni

2024



Ostermäntiger: MO, 01.04.2024

Dä Ostermäntig muesch unbedingt ihschribe! Aus 4er-Team chasch du di bi verschiedene Pöste bewise, wo d LJ Oenztal uf d Bei steut. U wes ganz guet chunnt, gits sogar no gueti Preise zum Abstoube. D Plätze si begränzt, drum mäud di zackig bir Andrea ah – im Ideaufau scho aus 4er-Gruppe (2 Manne & 2 Froue).

Töfflitour: SO, 07.04.2024

Mitem Töffli chli desume frese? Genau das isch dr Plan vo däm Sunntig. Huere guet, oder? Träffe tüe mir üs uf di 13:00 bim Klubrum u när entfühert üs d Linda id Region Murtesee. Ds Töffli saddle chasch de denn, itz muesch dir afe dr Platz ir Agenda reserviere, di Töffliwis fürenäh u di bis am 01.04. bir Linda ahmäude.



OP Schiesse: SA, 13.04.2024

Wüus zäme bekanntlech ringer geit, göh d Herre a däm Samstig ds OP Schiesse ga abhäkle. Mir Froue chöi denn chli plöischle. Das Abenteuer startet am 09:30 ds Worb u dr Bärni samlet bis am 12.04. aui Ahmäudige.



Escape Room: FR, 19.04.2024

We du gärn chli überleisch, zämestifflisch u so zure Lösig chunnsch, de bruche mir genau di! Üs ziehts nämlech uf Bärn i Escape Room. D Teilnähmerzau isch beschränkt uf 12 Hirni, drum muesch schnäu si mitem Ahmäude bir Linda – spetistens bis am 05.04. Mir nähme im Boll ds 19:04-Bähnli.

Utzigen Chilbi: FR & SA, 26. & 27.04.2024

Juhui, d Utzige Chiubi steit wieder vor dr Tür! Ds Chilbi-OK isch ih dä Startlöcher, d Vorfröid isch riisig u d Chläbere entdeckt me scho itz überau. Dr Ihsatzplan überchunnsch du scho gli, aber reservier dir scho itz näbst em FR & SA o grad dr SO, 28.04. für ds Ufrume. Wär Zyt het, o näbst sine Schichte ahzpacke, isch übrigens jederzyt wiukomme. Dankä scho itze viu, viu mau für di flissig Ihsatz!



Spiubä: DO, 02.05.2024

Es muess wieder einisch lustig zue u här ga. Drum hole mir paar Spili füre u verbringe zäme ä lustige, gmüetleche Abä. Chunnsch oh? Wenn u wo erfarsch no. D Jasmin fröit sech aber scho itz uf dini Ahmäudig.



BEA: SA, 11.05.2024

Ds letschte BEA-Ässe isch mittlerweile verdouet. Drum wei mir üs wie jedes Jahr ufem BEA-Gländ ga d Büch vuschlah u när öppe ono ga ds Festgländ unsicher mache. Ds Znacht gits ca. uf di 20:00 ar BEA, ahmäude darfsch di bis am 04.05. bir Nadine.

Goleten Chilbi: SA, 18.05.2024



Ja, du hesch itz grad Chiubi gläse! D LJ Thal het nämlech Party u da wei mir nid fähle. Chunnsch o mit, we mir a däm Samstigabä ds solothurnische Laupersdorf ahstüre? Du darfsch sogar useläse, bi wäm du di wettsch ahmäude: Jasmin oder Linda.

Bungee-Fitness: DO, 23.05.2024

Uf Google gsehts no easy us, weme da bim Bungee-Fitness chli dür d Umgäbig flügt. Ob das o würklech so isch, merke mir a däm Donnstigabä grad säuber. Träffpunkt isch 19:45 bim Klubrum u när düse mir de zäme uf Rubige. D Jasmin nimmt dini Ahmäudig entgäge, aber überleg dirs zackig, es chöi nämlech max. 12 Nase drbi si.



Chilbi-Ussufete: SO, 26.05.2024

Es Schnouserli u öppis zum Ahstosse blibt nach dr Chiubi sicher schono übrig. Drum isch a däm Sunntig usässe u ustrinke ahgseit! Ahmäude muesch di nid, darfsch eifach am 12:00 bim Klubrum uftouche. Bi Frage darfsch di bim Ändu mäude.

Minigolf: MI, 29.05.2024

Das chline Minigolf-Bäueli brucht aube no viu Fiingfüeu. Aber o we dus gärn chli gröber hesch, bisch o härzlech wiukomme. Trainig fürs Fiingfüeu gits gnue. Aber chöme mir zur Sach: Mir traffe üs uf di 19:30 bim Klubrum u göh när uf Oberburg. Dini Ahmäudig darfsch bis am 26.05. ar Andrea schicke.



Chrüpfe Drücker Chiubi: FR, 31.05.2024

Ar Chrüpfe Drücker Chiubi vor LJ Seeland ischs no geng fätzig zue & här gange. Drum wei mir o bir hüürige Usgab nid fähle! Vor Nadine überchunnsch de no aui witere Infos, aber ds Datum chasch ja scho mau dick ihschribe.

Bierbrauerei Feldschlösschen: SA, 08.06.2024

Wettsch o gärn wüsse, was gnau hingeremne guete Fäudschlössli-Bier steckt? De chumm a däm Samstig unbedingt mit! Mir gseh üs uf di 13:00 bim Klubrum u stüre när Rheinfelden im Kanton Aargau ah. Ahmäude bis am 31.05. bim Küsu.



Seilpark: SO, 09.06.2024

Mir häbe mau chli ab u turne ir Luft desume. Für das ziehts üs ufe Sunntigmittag ih Seilpark uf Aigle im Wäusche. D LJ Schallebärg chunnt übrigens ono grad mit! Bisch o drbi? De fröit sech d Nadine uf dini Ahmäudig bis am 31.05.

Bluetspände: MI, 12.06.2024

Öppis Guets tue, isch no geng guet gsi. Mir wei a däm Mittwuchabä zäme ga Bluet spände. We du di gsung füeusch, we du mind. 18ni bisch u we dini Waag mind. 50kg ahzeigt, de bringsch du scho di wichtigste Vorussetzige mit. Ds Bluetspände isch zwüsche 19:00 – 20:00 ds Vechige planet u üsi Tätschmeisterin isch d Jasmin.



Seilizieh LJ Untere Emme: FR, 14.06.2024


Hau ruck & schriisse winemore! Das isch ds Motto vo däm Fritigabä. D LJ Untere Emme organisiert wieder ds jährleche Seilizieh u dr Ändu nimmt dini Ahmäudig entgäge.

Kartfahre: SA, 22.06.2024

We dir uf dr Töfflitour d Nechi zum Bode gfäut het, de muesch mit cho Kartfahre, da bisch am Bode paar cm necher! Träffpunkt isch 13:00 bim Klubrum u när geits de ab uf Lyss. Dr Ändu nimmt d Ahmäudige bis am 16.06. entgäge.


Pizza ässe: MI, 26.06.2024

Hawaii, Proscuitto, oder doch ender scharfi Salami? Es het sicher dini Lieblingspizza o drbi! We dir itz scho dr Söifer im Muu zämelouft, de mäud di doch grad ah u zwar bis am 20.06. bir Andrea. Mir gseh üs uf di 19:00 bim Klubrum. Wo dass es när häregeit, isch ä Überraschig!



Hohgant-Wanderig: SO, 30.06.2024

Ufem Hohgant ischs cheibe schön. Drum wei mir zäme dert ueche! Dr Küsu isch üse Reiseführer. Pack di Rucksack u gib am Küsu bis am 23.06. Bscheid, we du a däm Sunntigmorgä uf di 09:00 o zum Klubrum chunnsch. När geits de ab ufe Hohgant!



Vorschau

- Regio-Brätle bi üs Worbletaler: 19.07.2024
- Landjugi-Wettbewerb im Wäuschland: 12.-14.07.2024
- SAC-Hütte: 20. & 21.07.2024 → Bärni
- Landjugi-Ferie Mallorca: 05.- 09.08.2024 → Doris & Julia
- Europapark: 27. & 28.09.2024 → Jasmin
- Oktoberfest Stuttgart: 04.-06.10.2024
- Volleyballturnier: 12.11.2024
- Skiweekend: 10. - 12.01.2025

Kontakt

Andrea: 079 104 36 68

Region West:

Jasmin: 079 618 56 20

Melanie: 077 525 06 35

Bärni: 076 443 19 57

Nadine: 077 521 73 69

Ändu: 077 459 99 18

Linda: 077 477 23 02

Küsu: 079 924 67 48